

IKHWĀNUL MUSLIMĪN

CITA-CITANYA TETAP HIDUP!

Ketika ‘Abdul Qādir ‘Awdah (Setiausaha Agung Pertubuhan ‘Ikhwānul Muslimīn”) dijatuhkan hukuman gantung sampai mati, diterimanya hukuman itu dengan tersenyum! Sebab bagi seseorang yang hidup itu adalah cita-cita, hal yang seperti ini dipandanginya suatu hasil dari pendirian badan boleh mati, tetapi cita-cita tetap hidup!

Ingatlah bahawasanya bangunan Ikhwānul Muslimīn adalah sebagai alamat daripada kebangunan Islam kembali. Beratus tahun Islam dan umat muslimin jatuh tersungkur dihadapan fikiran-fikiran Barat dan penjajahan Barat. Sudah hampir putus asa umat muslimin melihat aliran ideologi yang bersimpang-siur di dunia ini. Al- Ikhwānul Muslimīn adalah pelopor daripada panggilan nilai cita-cita itu kembali. Sebagai sebuah pertubuhan orang ramai di Mesir dia dapat dilumpuhkan oleh kekuatan senjata dan adikara dan diktator di Mesir. Tetapi sebagai suatu cita-cita dia telah tumbuh dan dia telah menjalar kemana-mana pelosok di dunia ini.

Buah fikiran mereka telah dibaca diseluruh dunia Islam. Buku-buku yang mereka karang. Risalah-risalah Ḥasan al-Bannā, Ḥasan Al-Ḥaḍībī, ‘Abdul Qādir ‘Awdah, Muḥammad al-Ghazālī, Sayyid Quṭb, Sa‘īd Ramaḍān, Jawdah al-Saḥār dan lain-lain telah tersebar. Jika dibunuh di Mesir, mereka ada Syria, Iraq, Palestin, Lubnan, Pakistan, India, Indonesia, Turki dan lain-lain. Cita-cita mereka menyelip dalam segala mazhab, dalam segala fikiran dan dalam segala parti Islam.

Cita-cita Ikhwān menyelip dalam jiwa Ḥāji Sulung di Thailand, Haji Kamalun di Filipina, Muhammad Qāsim di Burma, dan dalam jiwa sebahagian besar pelopor negara dan ulama di Pakistan. Cita-cita Ikhwān masuk kedalam perjuangan umat islam di Tunisia, Morocco, dan al-Jaza’ir sehingga di segala tempat itu sekarang timbul pemberontak yang percaya kepada kekuatan iman sendiri, berpandu kepada *La ilaha illa Allāh!* Lebih hebat sebenarnya pemberontakan di Afrika Utara daripada pemberontakan Ho Chi Minh, yang terang dapat bantuan dari RRT (Republik Rakyat Teongkok) dan Rusia! Cita-cita Ikhwān Menyelinap dalam jiwa pemimpin-pemimpin parti Islam di Indonesia, baik Masyumi atau Nahḍah al-‘Ulamā’ atau Partai Sarekat Islam dan juga Muḥammadiyah! Buku-buku mereka dibaca oleh pemimpin-pemimpin itu sehingga menjadi pandu di dalam menegakkan cita-cita Islam!...”

Kata pujangga “HAMKA” dalam salah satu makalahnya yang bersemangat, yang menggambarkan jiwa Islam.